

M. Claude Wiseler, Président | Här Kartheiser, ech géif Iech awer elo bieden – mir sinn hei an enger Budgetdiskussioun –, et elo hei kuerz ze maachen.

M. Fernand Kartheiser (ADR) | Deen drëtte Punkt, Här President, ass och ganz wichteg, mengen ech. Et däerf een net d'Analys vun de Fakte mat Propaganda verwiesselen. Et gëtt ...

M. Marc Goergen (Piraten) | Well Dir Propaganda hei maacht.

M. Fernand Kartheiser (ADR) | Et gëtt am Abléck ... Nee, nee, ech maache keng Propaganda. Ech maachen Analys.

(Brouhaha)

M. Marc Goergen (Piraten) | Awer ganz kloer fir Russland maacht Dir Propaganda hei!

M. Fernand Kartheiser (ADR) | Ech maachen Analys, Här Goergen, ob Iech dat gefält oder net. Et gëtt an der russescher Doktrinn an an deenen Äusserunge vu russesche Politiker oder an iergendwellechen anere Sourcen, déi vun do kommen, menges Wëssens – also vun offizielle Sourcen – keng Indication, datt iwwert d'Ukrain eraus iergendwellech territorial Ambitiounen géinge bestoen. Dat gëtt et net. Ech wëll net soen, datt net vläicht iergendeen Hannergedanken huet. Ech wëll och net d'NATO a Fro stellen am Fall, wou et sou sollt sinn.

Ech soen Iech just: Ech maache keng Propaganda. Meng Suerg ass d'Zukunft vun der Ukrain. Ech gesinn, datt dat Land amgaangen ass, auszebludden an ënnerzegoen. An ech soen Iech: Eis Politick hätt dat kënne verhënnere an Är Politick, Här Goergen, féiert zu engem schrecklechen Zustand vun der Ukrain, wou ech net weess, ob se et kann iwwerliewen.

Ech soen Iech Merci.

M. Claude Wiseler, Président | Sou, domat ass déi do Diskussioun ofgeschloss.

4. Ordre du jour

Elo just, fir datt jiddweree weess, wou mer dru sinn: Ech hunn elo nach zwee Riedner, déi sech ageschriwwen hunn. Dat ass éischters den Här André Bauler an zweetens d'Madamm Corinne Cahen. Ech wollt Iech elo proposéieren, datt mer déi zwee Riedner nach haut duerchuelen, datt mer duerno hannendrun déi Motioun, déi vum Här Spautz agereecht ginn ass, iwwer Taiwan nach maachen, well muer de Mëtten hu mer zéng Motiounen an eng Resolutioun. Dat ass schonn e gudden Deel Aarbecht plus nach eng ganz Rei aner Saachen um Programm. Dofir géing ech gar bis dohinner fieren. A muer de Mëtte fuere mer da weider mat der Regierung, déi Stellung hält, éier mer zum Vott vun dem Budget kommen.

Wann Der domat averstane sidd, da géinge mer elo weiderfieren, andeem mer dem Här André Bauler d'Wuert ginn, fir seng Ried ze halen. Ech wëll domat soen, datt d'DP nach theoreetesche 60 Minutten hätt.

(Exclamations et hilarité)

Mee ech géing bieden ... Ech hunn dat Wuert „theoreetesche“ net onschëlleg gebraucht.

5. 8383 – Projet de loi concernant le budget des recettes et des dépenses de l'État pour l'exercice 2024 [...]

8384 – Projet de loi relative à la programmation financière pluriannuelle pour la période 2023-2027

Programme de stabilité et de croissance (PSC) et programme national de réforme (PNR) (suite)

Här Bauler, et ass un Iech.

Discussion générale (suite)

M. André Bauler (DP) | Merci, Här President. Léif alleguer, ech kann Iech direkt berouegen, ech brauch déi Zäit sécherlech net. D'Madamm Adehm huet an hirem Bericht de Schwéierpunkt op d'Finanzplaz geluecht. Dat ass e séier interessanten Exercice. Si ass domadder d'ailleurs e weidere Finanzplatzexpert an der CSV, nieft dem eminenten Här Mosar. Voilà, ech géif hir dofir felicitéieren, zemol wann ee weess, wat fir e Gewicht d'Finanzplaz an der Lëtzeburger Economie huet, wuel wëssend awer, datt mer ganz aner Branchen hunn, déi och dynamesch sinn: eist Handwerk, d'Industrie souwiesou, d'Landwirtschaft an all aner schaffend Beräicher, déi zu eisem Räichtum bäidroen.

Déi Analys iwwert d'Finanzplaz, denken ech, kéint ee roueg weiderféieren. D'Madamm Adehm huet versicht, se ze belichten op verschidde Facetten, déi Plaz, mee et kéint ee se weiderféieren an deem Sënn, datt een och nach kéint kucken, inwiefern d'Vernetzung, d'Verbannung mat anere Branchë spillt. Ech mengen, dat wier en interessanten Exercice, deen ee vläicht op eiser Universiteit kéint weiderféieren, déi eis nach weider Erkenntnisser kéint liwweren. Jiddefalls ass den Impakt vun der Entwécklung vun der Finanzplaz op eise Staatsbudget grouss.

D'Demokratesch Partei steet fir stabill Staatsfinanzen. Dofir mussen mer eis Ressourcë gutt asetzen, fir och déi néideg Investissementen ze tätigen, déi eist Land op muer virbereeden, an ëmmer nees kapabel sinn, fir méiglech nei Recetten ze erméiglechen. Dat setzt viraus, datt eis Wirtschaft attraktiv ass a bleift, datt mer weider innovéieren an datt mer eng gesond Trajectoire fir eis Staatsfinanzen hunn. Well mir brauchen e gewëssene budgetäre Spurt, fir op weider Krisen ze reagéieren. Dat ass och vun der Oppositionssäit betount ginn. Denke mer u Stéchwierder wéi „Klimakris“ oder weider nei geopolitesch Krisen. A mir mussen och e Bléck op d'Entwécklung vun den Zënse behalen, well déi Entwécklung huet jo a rezenten Vergaangenheet zu enger weiderer Belaaschtung vun de Finanzen geféiert.

Och wann et op der Recettensäit fir déi kommend Méint besser ausgesäit, well do nach gewësse Solden u Steieren austinn, sou ass dat awer kee Grund, fir an d'Luucht ze sprangen. Virsicht ass deemno gebueden an et gëllt eeben, Fouss bei Mol ze behalen.

Léif alleguer, mir liewen an enger Zäit, wou sech eist Ëmfeld séier verännert, Stéchwuert „Digitaliséierung“. Villes ass a Bewegung an d'Welt vun haut ass voller Erausforderungen an Onsécherheeten.

Mir müssen eis wappnen, fir mat weltwäite Konkurrenz mathalen ze kënnen, déi riskéieren, sech vill méi séier op d'Veännerungen anzustellen, wat derzou féiere kéint, datt mir u Kompetitivitéit verléieren.

D'Regierung setzt ënner anerem dofir drop, fir d'Digitaliséierung weiderzedreiw. Beim Staat selwer géif eis dat erméiglechen, dass déi staatlech Verwaltung méi effikass kéinte schaffen. Déi administrativ Hürden, mat deene sech d'Bierger an d'Betribler ploeg mussen, sollen och reduzéiert ginn, ënner anerem duerch de Once-Only-Prinzip. Et ass och eng Fro vu Käschte fir eis Betribler.

Well de verantwortlechen a wierksamen Ëmgang mat der Digitaliséierung geléiert muss ginn, gëtt dëst Thema dowéinst och méi geziilt an eise Schoule

behandelt an d'Schouloffter gëtt och dann deementsprechend reegelméisseg ugepasst.

Och wann d'Digitaliséierung immens vill Virdeeler an Opportunitéite mat sech bréngt, steet se ëmmer nees a Verbindung mat verschidde Risiken, wéi d'Cyberattacken op d'Sitte vun der Regierung an der Chamber an de leschte Wochen et gewisen hunn. Do gehéiert et zu der ieweschter Prioritéit, derfir ze suergen, datt mir d'Sécherheet an deem Beräich verstärken a grad verschidde Risike fréi genuch erkennen, fir dergéint kënne virzegoen. D'Erfahrung léiert eis, datt mer eeben nach méi widderstandsfäeg mussen ginn an dofir an dese Beräich vun eiser Economie müssen investéieren.

Ech ginn awer och dem Här Wagner Recht – e wäert elo ganz verwonnert sinn –, datt d'Digitaliséierung sécherlech net all Problem op dëser Welt an an eiser Gesellschaft wäert kënne léisen. Dofir bleift sécherlech de perséinleche Kontakt wichteg, och tëschent de Biergerinnen a Bierger an der Verwaltung op där anerer Säit. An ech ginn dem Här Spautz och Recht, datt et eng ganz Rëtsch Leit gëtt, déi sech schwéier mat der Digitaliséierung dinn. Ech verweisen do op eng Question parlementaire, déi ech nach am Wanter gestallt hat, wou déi zoustänneg Ministesch agaan ass op eng ganz Rei Hëllefstellungen, déi och fir déi do Leit ugebuede ginn.

Här President, de Fridde an d'Sécherheet sinn déi éischt Viraussetzungen, fir e staarke Sozialstaat ze garantéieren. Direkt duerno, un zweeter Stell also, steet eeben eng gesond wirtschaftlech Entwécklung. D'Krise vun de leschte Joren hu sech op eis ekonomesch Aktivitéit negativ ausgewierkt, ob duerch Retarden an de Liwwerketten, wéi mer se während der Pandemie kannt hunn, duerch héich Energiepräisser an eng héich Inflation oder och nach duerch héich Zënssätz.

2023 gouf en negative Wuesstum vun 1 % festgestallt an eng Inflation vun 3,7 %. Eis Biergerinnen a Bierger, ma och eis Betribler haten et guer net einfach, fir dës Situatioun ze bewällegen. Mee déi lescht Regierung, déi lescht Koalitioun, huet alles gemaach, wat méiglech war, fir Land a Leit, wéi den Här Roth ëmmer sou schéi seet, de Biergerinnen a Bierger, ënnert d'Äerm ze gräifen.

D'Attraktivitéit vun eiser Economie sécheren, de gesellschaftlechen Zesummenhalt stäerken an nohalteg wirtschaften, dat ass de Kader, an deem sech och dese Budget, de Budget vun 2024, beweegt oder beweegen wëllt. Och dese Budget strieft also eng nohalteg Wirtschaftspolitik un a wëll de Leit finanziell ënnert d'Äerm gräifen.

D'Stärke vun der Kafkraaft bis déif an d'Mittelschicht eran, dat war a bleift och fir meng Fraktioun eng grouss Prioritéit. Als Demokratesch Partei setze mer eis dowéinst fir eng schrittweis Upassung vum Steuerbarème un d'Präisdeierecht an.

Ech kréien e Fanger ... Ass eppes geschitt?

(Interruption par M. Gilles Roth)

A, gutt. Ech gesinn och den Här Wiseler net méi hei. Soss hunn ech hien alt hei gesinn.

(Hilarité)

Du konnt ech mech besser orientéieren u senger Mimik.

M. Claude Wiseler, Président | Här Bauler, fuert einfach weider, och wann Der mech net gesitt.

(Hilarité)

M. André Bauler (DP) | Ech spieren Iech. Ech spieren Iech, Här President.

(Hilarité)

Als DP setze mer eis jiddefalls dowéinst fir eng schrittweis Upassung vum Steuerbarème an – un d'Inflation wuelgemierkt, un d'Präsideierrecht. Wéi de Fonds monétaire international et viru Kuerzem bestätegt huet, huet den Indexmechanismus et erlaabt, fir am Joer 2023 de private Konsum trotz der Rezession héich ze halen.

Mir begréissen ausdrécklech d'Bäibehale vum Indexsystem an all déi vill Mesüeren, déi d'Mittelschicht kuerzfristig entlaaschte wäerten. Schonn ugangs 2024 huet d'Upassung vum der Steiertabell un d'Präsideierrecht de Leit hir Kafkraaft gestärkt. Déi fréier Regierung hat eng Upassung vum 2,5 Indextranchen ab dem 1. Januar vum deem Joer virgesinn an och decidéiert. Déi nei Koalitioun huet dann nach eemol annerhallef Tranche dropgeluecht.

De Leit hir Kafkraaft gouf gestärkt. Ma mir därefen net vergiessen, datt och a grad d'Betriber, an deenen d'Leit schaffen, mat de Suite vum der Pandemie a vum der Energiekris ze kämpfen huten. Mir setzen eis dofir virun allem als Prioritéit, fir déi Branch vum eiser Economie, vum eiser Wirtschaft, ze ënnerstëtzen, déi et am meeschte brauchen.

E pertinent Beispill an deem Beräich ass de Bausecteur. An deem Sektour gëtt et ebe ganz vill kleng a mëttelstännesch Betriber, wou Dausende vum Aarbechtsplazen drunhänken, déi am Moment riskéieren, deelweis verluer ze goen, wa mer net reagéieren. Dës Aarbechtskräfte feelen awer spéider, wann et nees zu enger Reprise op deem Feld kënnt. An dofir musse mer alles drusetzen, fir dëse Sektour ze stabiliséieren. Fir der Kris am Bausecteur entgéintzewierken, awer och de Betriber an anere Sektouren ënnert d'Ärm ze gräifen, huet d'Regierung dofir verschidde Moossnamen en place gesat, wéi zum Beispill déi konjunkturbedéngte Kuerzaarbecht. Fir de Mount Mee kruten 111 Entreprises d'Kuerzaarbecht geneemegt, wouvunner 44 dem Bausecteur eeben ugehéieren.

D'Logementskris huet natierlech och en Impakt op den Immobiliensecteur, wou d'Aktivitéit spierbar zrëckgaangen ass. An deem Sektour ginn, wann een der Chambre immobilière gleewen dierf, eng ronn 400 Entloossungen erwaart. Dowéinst ass et wichteg, datt mer d'Bauwirtschaft sou séier wéi méiglech stimuléieren. Wéi sot e fréieren, en alen Economiesproff, deen ech hat, ganz einfach formuléiert? „Bau gut, alles gut!“ An deem Fall stëmmt dat schonn.

D'Ausmooss vum dëser Kris reflektéiert sech ënner anerem och doranner, dass souguer déi ëffentlech Bauräger – et ass och virunner gesot ginn – wéi d'SNHBM Schwieregkeeten hunn, fir hir Wunnengen ze verkafen, déi eigentlech als abordable Wunnengen gëllen.

Léif alleguer, eis Betriber sinn awer net just der konjunktureller Entwécklung ënnerworfen, mee och eeben d'energeetescher an d'numerescher oder digitaler Transition. De Budget 2024 huet dofir als Zil, fir d'Betriber weider dobäi ze begleeden an eng dekarboniséiert Circulaire- an Digitaleconomie ze gestalten. Fir d'Betriber dobäi ze ënnerstëtzen, de Wee vum der Nohaltegkeet ze goen a méi einfach an déi duebel Transition ze investéieren, gëtt de Régime de bonification d'impôt bäibehalen.

Och a grad musse mer drop oppassen, datt eng gewësse Previsibilitéit fir d'Entreprises an déi schaffend Leit ka garantéiert ginn an dass déi administrativ Contrainten net zu enger ze grousser Belaaschtung ginn. Dofir setze mer eis fir eeben den Ausbau vum Once-Only-Prinzip an oder fir gekierzte Reporting-Obligatiounen, wou et méiglech ass.

Mir sinn eis alleguer bewusst, datt eis Wirtschaft zu engem gudden Deel vum der Finanzplaz ofhänkt.

D'Madamm Rapporteur huet dat jo an hirem Bericht méi wéi ënnerstrach. Fir manner ofhängeg ze si vum deem Sektour, ass et immens wichteg, datt mer d'Diversifizierung vum eiser Gesamtwirtschaft net vernoléisegen. An do huet déi fréier Regierung, déi zwou fréier Koalitiounen, scho ganz weesentlech Akzenter gesat, déi och elo kënne weidergefouert ginn.

Verschidde Beräicher, déi et weiderzeentwéckele gëllt, leien eeben am Beräich vum der Dateverwaltung, der Kënschtlicher Intelligenz oder och nach dem Espace. Am Space zielt Lëtzebuerg mëttlerweil zu de weltwäite Precurseuren oder Virreider. Dës ass drop zrëckzeféieren, dass mir an deem Beräich schonn zanter den 80er-Joren aktiv sinn, Stéchwuert „Société européenne des satellites“, an d'Aktivitéiten ëmmer erëm mat Erfolleg woussten auszubauen.

En attraktiven an innovativen Standuert brauch och qualifizéiert Aarbechtskräften. Et geet drëm, fir ebe spezialiséiert Aarbechtskräften op eise Marché ze bréngen, an dat an alle Branchen. Net nëmmen an de Finanzen, mee och zum Beispill an der Industrie oder am Handwerk. En Handwerk, wat iwwregens – de Mëttelstandsminister weess dat – ëmmer méi digital ausgeriicht ass.

Dës ass eeben onëmänglech, well mir a verschiddene Sektouren eng – et kann ee bal soen – chronesch Penurie vu Main-d'oeuvre hunn. Wéi scho gesot, mat Talent..., verschiddener hunn dat Wuert net gär heibannen, mee mat Talent Attraction ass net just den héich qualifizéierten Informatiker oder de Fongmanager gemengt, mee och Leit, déi héich Kompetenzen an handwierklech-technologeschen Aktivitéiten hunn. Dat gëtt ganz dacks am politeschen Diskurs iwwersinn.

Eng Méiglechkeet, fir eisen Aarbechtsmaart méi kompetitiv a méi attraktiv ze gestalten, läit doranner, fir eng gewësse Flexibilitéit anzeféieren, déi dem Salarié, awer och dem Betriber zeguttkënnt, sief dat beispillsweis – Dir wësst et – duerch den Teletravail, duerch méi flexibel Aarbechtszäiten oder duerch den Ausbau vu Coworkingplazen – et muss ee soen –, do, wou et Sënn ergëtt, Sënn mécht.

Doriwwer eraus musse mer eis Zones d'activités économiques ausbauen an den Terrain, dee verfügbar ass, am Sënn och vu méi nohalteger Bauweis besser notzen. Dat ass och eng vun de Prioritéiten vum der neier Regierung.

Wa mer vum der duebeler Transition schwätzen, da si mer och séier bei der Energie. D'DP setzt sech, sou wéi et am Koalitionsaccord steet, fir en Ausbau vum der nohaltegen Energien an. Den Energiemix soll weider diversifizéiert ginn, well mer weeder vu fossile Quellen nach vum der Atomkraft laangfristeg total ofhängeg wëlle sinn. Allgemein gëllt: D'Regierung solle, jo mussen d'Fuerschung an erneierbar an nohaltege Energiequellen ënnerstëtzen an deen dofir erfuerderte Kader setzen.

D'Investitiounen an d'Stroumnetz vu muer musse mer ganz héich halen. Mir mussen eis näischt virmaachen: Dës Prozess ass keen einfachen, well Wand- a Solarkraft vum Wieder ofhängeg sinn. Eisen Engagement fir Offshore-Wandenergie hu mer schonn duerch eis Bedelegung um Projet fir déi éischt sougenannten „energeetesche Inseln“ – e Projet, deen an der leschter Regierung ugestouss gouf – an Dänemark ënnerstrach.

Egal wéi, mir musse wëssen, datt am Beräich vum der nohaltegen Energie weider massiv gefuerscht an investéiert muss ginn, fir Lëtzebuerg schnellstméiglech klimaneutral ze maachen a mir esou eis Ziler aus dem PNEC erfëllen. Dolaanscht komme mer net, dolaanscht féiert kee Wee. Ronn 68 % vum der Depense vum der Enveloppe vum Plan pour la reprise et

la résilience si fir Klimamoossname bestëmmt. Domat leie mer wäit iwwert dem Seuil minimal vu 37 %, dee fir dës Moossname vum der EU fixéiert ginn ass.

Léif alleguer, am grouse Ganze kann een also soen, dass mir eis duerch eis Akzenter an deem Budget derfir asetzen, fir dat Sozialt, d'Nohaltegkeet an d'Wirtschaft nach besser mateneen ze verbannen. Et misst een eigentlech soen: „dat Sozialt, dat Ekologescht an d'Wirtschaft nach besser mateneen ze verbannen“, well déi dräi bilde jo eng nohaltege Approche.

E groussen Deel vum eiser Wirtschaft stellt awer nach ëmmer d'Finanzplaz duer. Ech erënnere nach eng Kéier drun, dass mer während der Covidpandemie, wou et zum Stëllstand vum e sellegen ekonomeschen Aktivitéite koom, d'Gléck haten, dass de Finanzsektor dank der Digitalisierung weider fonctionéiere konnt. Doduerch war eis Economie resilient, méi resilient wéi déi vun anere Länner a konnt dës Schock besser offederen.

Den Defizit am Zentralstaat wier deemno méi grouss gewiescht – dat muss ee sech agestoen –, wa mer net iwwer esou eng staark Finanzplaz hätte kënne verfügen, wa mer déi net gehat hätten. Dobäi muss een awer och soen, dat hänkt ëmmer vum Genre, vum Typ vu Schock of, deen eis kéint treffen. Bei engem anere Schock wier et vläicht anescht gewiescht. Hei hate mer – wann een dat soen dierf – Gléck am On-glück.

Ronn 70.000 Persounen schaffen haut – wann een dat iwwert d'Banken, d'Assurancen a sou weider méi breet faasst – am Finanzsektor. Ech zielen och nach d'Investitiounsfongen derbäi. Déi meescht Leit, déi an deem Beräich schaffen, consomméieren och hei am Land, wat eis Betriber an hir Aktivitéit ënnerstëtzt. An dofir, Madamm Budgetsrapporteur, ass et sou, datt et sech géif lounen, dës Analys, déi Dir ugefaangen hutt, weiderzeféieren, andeems ee se nach géif verfeinere an och nach mat enger Rei Chercheuren ënnerstëtzen an deem Sënn, datt een déi Zesammenhäng, déi bestinn tëschent deene verschiddene Branchen, nach méi kloer gesäit an och déi Interdependance méi kloer erauskristalliséiert.

Jiddefalls ass et sou, datt et ouni eng dynamesch a performant Finanzplaz net dee staarke Sozialstaat hei zu Lëtzebuerg géif ginn, dee mer alleguer kennen, op dee mer houfreg sinn.

Ronn een Drëttel vum der gesamte Staatsrecetten oder Steuerrecettë kënnt aus der Finanzindustrie, jee no Entwécklung vum der Bourse. Fir nëmmen een Detail ze nennen, spullt eis d'Taxe d'abonnement tëschent 900 an 1.200 Milliounen an d'Staatskeess eran. Iwwregens dierf een net vergiessen: Mir sinn e Land, wat déi Taxe d'abonnement huet. Aner Finanzplaze kennen déi net.

Dës Ofhängegkeet vum der Finanzplaz bréngt eis derzou, datt mer alles mussen derfir maachen, fir attraktiv an och innovativ ze bleiwen. D'Finanzplaz muss mer eeben doduerjer méi resilient opstellen a weider diversifizéieren. Dobäi muss een awer an Erënnere ruffen, datt zanter der Banken- a Finanzkris an de leschten zwielef Joer, kann ee soen, déi Finanzplaz sech besser opgestallt huet, vill méi diversifizéiert ass wéi 2008 an 2009, an dass mer innerhalb vum der Spezialisatioun, déi d'Finanzplaz duerstellt, eng kloer Diversifikatioun hunn, déi eis doduerjer manner vulnerabel, manner fragill am Fall vum engem Schock mécht.

Ech bewonneren, den Här Roth kann zwee Leit gläichzäiteg nolauscheren. Très bien!

(Interruption par M. Gilles Roth)

Jo, ech soe jo, Dir kënnt gläichzäiteg zwee Leit nolauscheren. Très bien!

(Interruption et hilarité)

Merci, Här Baum.

Glücklicherweise, wéi gesot, ass dat sou gaangen, an dofir, mengen ech, war et och eng gutt Iddi, fir de Voleit vum den nohaltege Finanzen weiderzuentwéckelen, Stéchwuert „duebel Transition“.

An deem Sënn hunn eeben d'DP-Finanzministeren – d'DP-Finanzministeren! – an deene leschten zéng Joer grouss Ustrengungen ënnerholl, fir eis Finanzplaz op deem Gebitt attraktiv ze gestalten. Kee Wonner, dass Lëtzebuerg haut mat senger gränger Bourse zu den internationale Virreider a Saache Sustainable Finance zielt.

Här President, all dës Moosnamen, déi de Leit an de Betriber zegutt kommen, mussen och finanzéiert ginn. Do sinn d'Méiglechkeete bekanntlech net onbegrenzt. Och a Krisenzeite mussen mer alles drusetzen, fir gesond Staatsfinanzen ze gränger Bourse, well ouni gesond Staatsfinanzen kann ee kee staarke Sozialstaat finanzéieren.

Mir als DP hunn eis schonn ëmmer derfir agesat, dass mer eng responsabel Finanzpolitik fueren, an dofir ass et wichteg, dass mer eeben zu all Moment och kapabel sinn, fir engem neie Schock, ob e konjunkturell oder strukturell ass, finanziell entgéintzewierken.

Och wann déi makroekonomesch Aussichte fir dës Joer mat enger Croissance vun 2 % an der Stabilisation vum der Inflation op 2,2 % éischer méi positiv sinn, wéi erwaart, ass d'Inflation trotzdem net ze ënnerschätzen. Et gëtt erwaart, dass dës 2025 nees op 3,3 % klëmmt, well dann d'Mesure vum Energiepreisdéckel sollen auslafen.

Mee loosst eis virop kuerz nach de Stand vum eise Staatsfinanzen analyséieren. Do stichen dräi Punkten ervir: 2023 hate mer en Defizit am Zentralstaat vun 2,3 % am Verglach zum PIB, wéi d'Zentralbank dat viru Kuerzem preziséiert huet. A fir 2024 gëtt mat deem gläichen Defizit, och 2,3 %, gerechent. Ech wëll just soen: Den Defizit vun 2023 ass no eiser Entrevue mat der Zentralbank nach eng kéier adaptéiert ginn. Den Defizit soll 2025 op 2 % erofgoen.

Dës ass zréckzeféieren op de Finanzement vum deene verschiddenen – Dir wësst et – Solidaritéitspäck, dem Logementsdësch, der Upassung vum der Steiertabell un d'Inflation. Fir 2024 sollen d'Depensé vum Zentralstaat ëm 7,6 % an d'Recetten ëm 7,1 % klammen.

Den Objectif budgétaire à moyen terme vun 0 % soll 2024 och respektéiert ginn.

Mat der Reform vum Cadre de gouvernance européenne fällt dës Krittär – Dir wësst et – ewech.

An deem Sënn begrëisse mer d'Iddi vum der Aféierung vum engem nationale Kader, deen eis dobäi ënnerstëtzt soll, d'Entwécklung vum der Staatsfinanzen op laang Siicht ze suivéieren, d'Entwécklung vum der Sécurité sociale am Bléck ze behalen a fir eng gesond laangfristeg Budgetpolitik ze suergen. An engem klengen Land wéi Lëtzebuerg mat enger esou oppener Ekonomik, wéi mer se kennen, ass dat wierklech net vu Muttwëll. An zu där Diskussioun gehéiert och déi demografesch Entwécklung an hire finanziellen Impakt op d'Zukunft.

Gleeft een der Zentralbank, sou wäerten déi ëffentlech Verwaltungen bis 2027 all Joer mat engem Defizit ofschléissen, sou wéi dat och scho fir 2022 an 2023 de Fall war. De Solde vum der Sécurité sociale soll bis 2027 graduell erofgoen, also de positive Solde, wat derzou féiere wäert, dass dësen ëmmer manner den Defizit vum Zentralstaat kompenséiere wäert kënnen.

Wa mer eis elo mat der Staatsschuld befaassen, fällt eis op, dass dës och den Effet eebe vum der Krisen aus de leschte Jore reflektéiert. 2023 hate mer eng Staatsschuld vu 25,2 % am Verglach zum PIB an de Projektionen no soll se 2024 op 26,5 % klammen, fir dann 2025 bei bal 27 % ze leien.

D'Entwécklung vum der Inflation a vum den Zësen, dat sinn zum Beispill Ongewëssheeten, dat sinn Inconnues, déi op d'Entwécklung, d'Evolution vum der Staatsfinanzen spille kënnen. All weider Kris, mat där een net rechnen konnt, huet direkt Konsequenzen fir eise Staatsbudget. Ech mengen, do si mer eis esouwiel als Majoritéit wéi als Opposition eens. An do beweegen mer eis momentan an engem ëmmer nees labillen Ëmfeld, dat quasi all Dag Iwwerraschungen an Unsécherheete prett hält. Denke mer un e Blockage vu Schëffer am Roud Mier, an der Strooss vum Hormus oder un d'Äerdbeben op Taiwan, wat elo kierzlech war, oder un e militäresche Konflikt an der Strooss vu Formosa.

Zu enger responsabel Finanzpolitik gehéiert et, d'Recetté wéi och d'Depensé genee am Bléck ze behalen.

D'Experte vum ieweschte Rot vum den ëffentlechen Finanzen, dem CNFP, gesi kee Problem op der Säit vum der Recetten, mee eeben éischer op der Säit vum der Depensen.

Verschidden Depensé mussen ëmmer nees, dat muss erlaabt sinn, kritesch hannerfrot ginn. Dat ass wouer. A mir dierfen op der anerer Säit awer net an eng Austeritéitspolitik falen. Grad an dësen onrouegen Zeite brauche mer e staarke Staat. D'Leit an d'Betriber brauchen eis voll Ënnerstëtzung.

D'Investissementen mussen eeben dofir héich gehale ginn, fir déi ekonomesch Aktivitéit ze stäipen an d'Infrastrukture vum Land ze moderniséieren. An d'sozial Moosnamen dierfen op kee Fall gekierzt ginn, well déi sozial Kohäsion an Zeite vu wuessender Aarmut fir eis un éischer Plaz steet.

Och wann d'Evolution vum eise Recetten den Ament positiv agestuut ka ginn an et do eng méi oder manner onfräiwëlleg Mouk gëtt, ass et schwéier, virauszesoen, wéi sech dës Recetté konkret an den nächste Joren entwéckelen wäerten, grad well mer an engem onstabilen internationalen Ëmfeld liewen.

Och d'Zentralbank recommandéiert, fir verschidden Depensen ëmmer nees kritesch ze hannerfroen.

Eis kleng Ekonomik, déi oppen ass, gëtt vum enger gewëssener Volatilitéit gepräagt. No engem externe Schock kënnen mer ganz séier a budgetär Laberente geroen.

Här President, d'Krisen aus den zwee leschte Joren, virun allem déi, hunn eisen Defizit zolidd klamme geden. Eis Staatsrecetten hänke staark vum allgemenge konjunkturellen Ëmfeld of, am Speziellen och vum der weltwäiter Boursenentwécklung. Denke mer nëmmen un d'Recetten aus der Taxe d'abonnement.

Dowéinst mussen mer virsiichteg virgoen: Fir de Staatsdefizit ze reduzéieren, mussen d'Depensé méi lues klamme wéi d'Recetten. Ech widderhuelen: D'Depensé mussen méi lues klamme wéi d'Recetten. Et geet net drëm, fir d'Depensen ze kieren.

De Finanzminister sot a senger Budgetried, dass fir 2025 un engem positive Schéiereffekt tëschen den Ausgaben an den Einnahmen geschafft gëtt. D'Recetté solle méi séier wuessen wéi d'Depensen. Mir wëssen iwweregens och, dass nach eng Rei Solden – ech hunn et virunner gesot – aussti bei de Recetten an et dofir éischer zu enger positiver Entwécklung ka kommen.

Iwwert d'Period 2025 bis 2027 soll d'Croissance moyenne vum der Depensé vum Zentralstaat bei 4 % leien a bei de Recetté soll d'Croissance sech bei 5 % situéieren.

De Finanzminister huet an engem Interview gesot, dass manner Leit beim Staat agestellt solle ginn, och soll de Staat manner kafen a méi Gebaier lounen.

Et muss een awer betounen, dass een a verschiddene Beräicher net esou einfach op Personal verzichte kann, wéi beispillsweis bei der Police, an der Justiz oder am Enseignement respektiv an der Erziehung.

Misst et zu Reduzéierung vum der Depensé kommen, da soe mir als DP-Fraktioun, dass dës an aller Transparenz géintiwwer dem Parlament an de Biergerinnen a Bierger gemaach sollt ginn an a Form vum enger Opléschung, wéi dat och schonn an der Vergaangenheet vu fréiere Koalitiounen gemaach gouf.

Do mussen mer och bedenken, dass d'nächst Joer potenziell nei Ausgaben op eis duerkommen, wéi beispillsweis d'Käschten duerch verschiddene Steiermoosnamen fir d'Relance am Wunnengsbau, déi fir 2025 nach net am Finanzplang agerechent sinn.

D'Cour des comptes, de Rechnungshaff, mécht drop opmierksam, dass den aktuelle geopolitische Kontext, d'Klimakris an d'Volatilitéit vum makroekonomeschen Ëmfeld en Afloss op d'Staatsschuld kéinten hunn, wat och zu enger Deviation vum der aktuelle Prognose kéint féieren.

Et ass dofir wichteg, dass mer, wéi ech gesot hunn, dee Spillraum behalen, fir op weider Schocken ze reagéieren.

Wéi de Conseil national des finances publiques betount, dierfe mer d'Defien, déi mëttel- a laangfristeg op eis duerkommen, wéi beispillsweis och déi demografesch Entwécklung – eis Bevëlkerung gëtt ëmmer méi al –, net aus den Ae verléieren.

Dowéinst si mer dann och der Meenung, esou wéi d'Zentralbank a recommandéiert, dass zousätzlech Recetten, déi generéiert ginn, solle genotzt ginn, fir sech e budgetäre Puffer opzebauen.

D'Mise en place vum enger soutenabler Trajectoire fir d'Staatsschuld ass dofir onëmgänglech, fir eisen héije Rating bei der Kreditwürdigkeet och an Zukunft ze garantéieren an derfir ze suergen, dass déi méi jonk Generatiounen net mat enger strammer Staatsschuld konfrontéiert ginn.

Léif alleguer, dës Budget – et ass scho gesot ginn – ass en Iwwergangsbudget. Fir 2025 wäert déi nei Koalitioun sécherlech hir eegen Akzente setzen. D'Staatsfinanzen kënnen nëmme gesond bleiven, wann de Staat sech senger begleetender a leedender Roll bewosst ass a bleift. D'Regierung schafft de Kader, fir dass et de Leit finanziell soll gutt goen a fir dass dat wirtschaftlech Ëmfeld attraktiv bleift.

Attraktiv bleift ee virun allem mat enger verantwortlecher Steuer- a Budgetpolitik, mat modernen Infrastrukturen, mat engem zukunftsorientéiert Bildungssystem, mat performante Gesondheitsstrukturen a mat enger intelligenter Diversifizierungspolitik op wirtschaftlech Plang, déi eis och manner vulnerabel maache soll.

De Wirtschaftsminister Lex Delles setzt sech kloer derfir an, d'Entwécklung vu verschiddene Branchen ...

(Interruption par M. Gilles Roth)

... – déi eng soe Branchen, déi aner soe Secteuren, dat gëtt net méi esou genee gekuckt –, wéi zum Beispill dem Space, den Daten an der Kënschlecher Intelligenz oder der Beräich vum der Logistik virunzebréngen. Mee och den Ausbau vum der Kreeslafwirtschaft soll net ze kuerz kommen.

An dësem Kader ginn d'Ekonomie, d'Energie, d'Digitaliséierung an d'Fuerschung Hand an Hand. Dofir ass et och wichteg, d'Innovatioun ze fërderen, a Startuppen ze investéieren, mee och verschidde Projeten am Beräich vun der Recherche ze lancéieren. D'Uni spillt natierlech an deem Kontext eng entscheidend Roll an der Implementatioun och zum Beispill vun engem Medical Hub. Dës kéint och eis Industrie am medezinnesche Beräich virubringen an domadder en neie Creneau weiderentwéckelen.

Kuerz gesot, et muss een ëmmer nees innovéieren an och gewinnt Reflexer a Fro stellen. An där Erausfuere-derung gëllt et, sech ze stellen.

Ech soen Iech Merci fir Är Opmierksamkeet an Är Gedold zu dëser spéider Stonn. Merci.

Plusieurs voix | Très bien!

M. Claude Wiseler, Président | Ech soen dem Här Bauler villmools Merci. An dann ass déi lescht ageschriwwen Riednerin d'Madamm Corinne Cahen. Madamm Cahen, Dir hutt d'Wuert.

Mme Corinne Cahen (DP) | Villmools merci, Här President. Léif Kolleeginnen a Kolleegen, et gëtt Saachen, déi kann een net einfach esou am Raum stoe loossen. Soll ee se ignoréieren? Dat ass jo dat, wat mer dacks maachen. Abee, ech mengen, et kann een net alles ignoréieren.

Et sinn Aussoen heibanne gemaach ginn, déi séier weineg mam Budget ze dinn hunn, mee déi Aussoen, déi si just gemaach gi fir ze provozéieren. An ech kann déi einfach net esou hei stoe loossen.

Den Här Keup, dee leider elo net méi hei ass, huet sech a senger poleemescher Ried permanent selwer widdersprach. En hetzt, wéi ëmmer, géint d'Ausländer, géint d'Immigratioun, an e wëllt d'Gefill verspreeden, dass et ons besser géif goen, wa mer just ënner Lëtzeburger wieren.

M. Fernand Kartheiser (ADR) | Dat ass komplett falsch!

Mme Corinne Cahen (DP) | Hie mécht esou, wéi wa just Mënsche mat Lëtzeburger Wuerzelen a Lëtzeburger Nationalitéit de Räichtum hei am Land geschaffen hätten.

(Interruption)

Här President, kënnt Der wannechgelift mir d'Wuert ginn a kengem aneren! Merci.

M. Claude Wiseler, Président | D'Wuert huet d'Madamm Cahen, an ech géif effektiv d'Kolleege bieden, d'Madamm Cahen schwätzen ze loossen.

Mme Corinne Cahen (DP) | Ënnerschwelleg probéiert en, de Leit wäisemaachen, dass mer dee selwechten, wann net esouguer e bessere Liewensniveau hätten, wa mer gemittelt ënner ons wieren, ouni all déi Mënschen, déi aus Europa an der Welt bei ons wunne komm sinn a schaffe komm sinn. Abee, ech soen Iech: Hie läit op der ganzer Linn falsch!

Zouwanderung war fir ons hei am Land eng Chance an net, wéi hie mengt, e Problem!

Une voix | Très bien!

Mme Corinne Cahen (DP) | Wa mer eng staark Finanzplaz hunn, dann hu mer dat och deenen ze verdanken, déi bei ons schaffe komm sinn, déi mat hirem Knowhow a mat hirer Erfahrung heihinner liewe kouden.

Eng Kolleegin, d'Familljeministesche an Däitschland, hat mer virun e puer Joer gesot, dass d'Definitioun vun „Deutsche mit Migrationshintergrund“ déi wär, dass ee vun de véier Grousselteren net däitsch wär. Abee, wann ech heibanne géif froen, wien no dëser

Definitioun e Lëtzeburger mat Migratiounshannergrond ass, dat heescht, deen entweder eng Bomi oder e Bopi huet, deen net Lëtzeburger ass oder war, da wieren der bestëmmt vill derbäi! An dobäi sëtzen hei nëmme richteg Lëtzeburger. A wéi eng Nationalitéit oder Originn hunn d'Partner vun den Deputéierten? Ass dat wichteg? Ne! Et ass onwichtig.

Hie seet och, et misst een ophale mat enger Politik vun den Dreem. Abee, ech encouragéieren d'Regierung an de Familljeminister, mat der Politik vun der viregter Regierung weiderzefueren, der Politik vun der Offenheet, der Politik vum Accueil, der Politik vun der Solidaritéit, der Politik vum Zesummeliewen. All déi Nationalitéiten, déi hei am Land wunnen, sinn eng Chance. All dat Wëssen aus der ganzer Welt kënnt hei beieneen. Dat ass eng riseg Chance.

Plusieurs voix | Très bien!

Mme Corinne Cahen (DP) | All deenen, deenen et net esou gutt geet, egal wéi eng Nationalitéit se hunn, mussen mer hëllefen. An hëllef kënne mer just, wa mer d'Moyenen duerfir hunn. An d'Moyenen hu mer, wa mer genuch Leit hunn, déi Räichtum schafen, déi all Dag schaffen, déi all Joer Steiere bezuelen.

Da wëllt d'ADR ëmmer de Leit wäismaachen, dass ons Sprooch verluer geet. Ons Sprooch ass nach ni esou vill geschwat a geschriwwen ginn ewéi an de leschte Joren.

Plusieurs voix | Richteg!

M. Claude Wiseler, Président | D'Madamm Cahen huet d'Wuert.

Mme Corinne Cahen (DP) | Mir hunn immens vill investéiert an ons Sprooch.

(Interruption par M. Tom Weidig)

M. Claude Wiseler, Président | Här Weidig, d'Madamm Cahen huet d'Wuert.

Mme Corinne Cahen (DP) | D'Lëtzeburgergeschcoursé si méi ewéi ausgebucht a mir kënnen der net séier genuch nach bäisetzen. Mir hunn en Zenter fir d'Lëtzeburger Sprooch geschaf. D'Kanner léiere richteg Lëtzeburgergesch schreiwen. An ech kann Iech vläicht alleguer och en Trick ginn: Wann Der ëmmer alles spellcheckt, da schreift och Dir op eemol richteg Lëtzeburgergesch.

Esou, wéi den Här Keup sech aus Etüden erausitt, wat e wëllt liesen, esou mécht en et dann och mat den Aussoe vu mir. Et ass scho befriedend, ze héieren, fir mech wier d'Integratioun verpöont. Ech engagéiere mech all Dag fir d'Integratioun an d'Zesummeliewen, well ech un d'Stärkt gleewe vun der Multikulturalitéit, well mer all ee vun deem anere kënne léieren.

Dofir muss d'Politik och Instrumenter schafen a Plazen, wou d'Mënsche sech begéinen. An dat geschitt elo, nodeems d'Chamber dat neit Gesetz vum Zesummeliewe gestëmmt huet. An doranner kann ech d'Regierung just ënnerstëtzen.

Ech hu vun him natierlech net héieren, dass mer e Problem hu mat Immigratioun oder Ausländer, wann et zum Beispill ëm d'Fleegepersonal geet. Spéitstens an der Pandemie hu mer gesinn, dass mer all Einzelnen am Beräich vun den Alters- a Fleegeheemer an och vun de Spideeler brauchen. An do kann ee keen Cherry Picking maachen. Hie schéngt d'Leit aus dem Ausland jo a verschidde Kategorien anzedeelen.

An e schwelgt an Nostalgie. E wëllt déi gutt all Zäit zrëck, déi et esou, wéi hie se beschreift, iwwerhaapt net gouv. Wéi wa fréier alles besser war! Et war anescht, d'Welt ännert, a glécklecherweis evoluéiert onst Land och mat.

Och a punkto Schoul: Mir sinn der Meenung, dass all Kand et verdéngt huet, kënne seng Schoul anstänneg ofzeschléissen an net nëmme eng Zort vu Kanner.

Une voix | Très bien!

Mme Corinne Cahen (DP) | Dofir hu mir verschidde Schoule fir verschidde Kanner geschaf. Ass et net egal, a wéi enger Sprooch ee Bio, Geo, Geschicht léiert? Et geet jo do ëm d'Matière.

Et ass do dernieft falsch, ëmmer nees ze soen, d'Kanner an den öffentlechen Europaschoule géife kee Lëtzeburgergesch léieren. Genau de Contraire ass de Fall.

Der ADR hiren Discours iwwert d'Flüchtlingen ass in-supportabel. Ech wënschen Iech, ni an déi Situatioun ze kommen, dass Der viru Krich musst fortlafen. An ech erënneren drun, dass mer zu Lëtzeburg Gesetzer hunn. Haalt also wannechgelift endlech op, ze soen, bei unerkannte Flüchtlinge géif et sech ëm Wirtschaftsflüchtlingen handeln! Dat ass einfach faktesch falsch. Mir bidden deene Schutz, déi a Liewensgefor sinn. An dat mussen mer ons weiderhi leeschte kënnen.

Plusieurs voix | Très bien!

Mme Corinne Cahen (DP) | Dir maacht esou komesch Aussoen, wéi wann ons Liewensqualitéit erofgaange wier. Och dat stëmmt einfach faktesch net. Ausser Liewensqualitéit géif fir Iech bedeuten, nëmme Lëtzeburger Noperen ze hunn.

Fir mech bedeit Liewensqualitéit Fräiheet. Fir mech bedeit Liewensqualitéit Solidaritéit. Fir mech bedeit Liewensqualitéit Sécherheet.

An à propos Sécherheet, et gouf gemengt, dass een nees géif ëmdréien, wann een hei mam Zuch ukënnt. Jo, et dréit een ëm, wann een esou Rieden héiert wéi déi vun der ADR de Mëtten.

Villmools merci.

Plusieurs voix | Très bien!

M. Claude Wiseler, Président | Merci, Madamm Cahen. Ech hunn elo nach eng Wuertmeldung vun dem Här Kartheiser. Vu datt d'ADR nach Zäit iwwreg-huet, kritt den Här Kartheiser nach eng Kéier d'Wuert.

M. Fernand Kartheiser (ADR) | Villmools merci, Här President. Den Här Keup ass elo leider net méi hei ...

Une voix | O!

M. Fernand Kartheiser (ADR) | ... an ech wëll elo net den Droit de réponse fir hien ausüben, ...

(Interruption)

... well et ass Fait personnel. Mee ech wëll awer op e puer Saache reagéieren, an zwar op engem Niveau, deen dës Debatt, mengen ech, awer verdéngt an engem Parlament. An dat ass emol éischtens, dass ee bei der Wourecht bleift.

Ech hunn dem Här Keup seng Ried natierlech opmierksam verfolgegt, wéi déi meescht heibannen, an ech hunn déi Saachen, déi d'Madamm Cahen do behaupt huet, eigentlech net an där Ried erkannt.

Et ass richteg, dass den Här Keup eng hollännesch Etüd zitéiert huet, an där Ënnerscheeder gemaach goufen iwwert d'Belaaschtung fir de Staatsbudget, mee dat sinn universitär Etüden, wat d'Immigratioun eigentlech fir Konsequenzen op de Staatsbudget huet. Dat sinn universitär Etüden, déi kann ee gutt fannen oder net gutt fannen, mee d'Diskussioun dorüwer soll op engem akadeemeschen Niveau geféiert ginn.

Den Zoustand vun der Lëtzeburger Sprooch hei am Land ass an eisen Aen, och a mengen Aen, net esou zefriddestellend, wéi d'Madamm Cahen dat

duerstellt. Et ass richtig, et gi Saache gemaach fir d'Lëtzebuurger Sprooch. Mir begrëssen dat alles, mir ënnerstëtzen dat alles, mee et ass laang net genuch.

Et ass einfach esou, datt an enger ganzer Rei vun Aspekter de Gebrauch vun der Lëtzebuurger Sprooch, d'Presenz vun der Lëtzebuurger Sprooch am Alldag zrëckgeet, an der Geschäftswelt, am ëffentleche Raum. A mir bedauern dat a mir wëllen alles maachen, fir de Leit ze hëllefen, déi heihinner kommen, hei liewen, hei schaffen, an och d'Patronen ënnerstëtzen, fir de Gebrauch vun der Lëtzebuurger Sprooch och an der Aarbechtszäit kënnen ze léieren.

Mir ënnerstëtzen dat alles an deem Sënn, datt mer och déi Sprooch kënnen weiderbréngen. Mir wëllen nach an Europa Initiativen huelen, fir der Lëtzebuurger Sprooch en offizielle Statutt ze ginn, wéi dat och fir all aner Sprooch do de Fall ass.

Wësst Der, Dir hutt Saache gesot iwwert d'Integratioun an d'Immigratioun ..., ech komme gläich drop zrëck. Ech wëll just e puer Saache soen. Wësst Der, Madamm Cahen, ech erënnere mech ganz gutt, wéi mer nach déi aner Säit am Cercle waren, koumt Dir eng Kéier eran – ech wëll Iech elo net wuertwärtlech zitieren, soss kréien ech vläicht eng Remontrance vum Här Graas, ech hunn dat och net matbruecht, mee et ass aus der Erënnung –, datt Der gesot hutt, datt Dir dat ganz schlëmm fannt, wann ee sech muss upassen. Mee ech hunn, wéi den Zoufall et wëllt – vläicht hat ech dat am Gespür – e puer Notizen vu Saachen, déi Dir gesot hutt.

Aus dem „Lëtzebuurger Wort“ wëll ech en Artikel zitieren, d'„Lëtzebuurger Wort“ vum 7. Februar 2023: „Integratioun war gestern, heute soll das interkulturelle Zusammenleben gefördert werden. Von Familien- und Integrationsministerin Corinne Cahen [...] zum verstaubten Anachronismus vergangener Zeiten degradiert, soll das Wort Integration nicht mehr als Maßstab“ ...

(Interruption)

... „für das Zusammenleben der Kulturen hierzulande geltend gemacht werden.“ Net d'ADR, d'„Lëtzebuurger Wort“. Den „Essentiel“ vum 13. Februar 2023 seet: Corinne Cahen: „On ne parle plus d'intégration mais de vivre ensemble.“

Verstitt mech gutt: D'ADR huet näischt géint Vivre ensemble, ni. Mee mir stelle just fest, datt déi Presentatioun, déi Dir elo hei gemaach hutt iwwer Är Politik, wat Integratioun a Vivre ensemble ugeet, vläicht och an der Press anescht gesi gëtt, wéi Dir dat hei elo presentéiert hutt.

De 7. Februar 2023, an engem Projet de loi, deen Dir eis presentéiert hutt an deen och gestëmmt gouf iwwert de Vivre ensemble interculturel, ass den Objet vum Projet de loi esou beschriwwen: „Le texte vise à remplacer l'actuelle approche d'intégration par une approche plus large et ouverte du 'vivre ensemble interculturel'.“

Ech wëll Iech soen, Madamm Cahen, et ass Äert Recht, dat alles esou ze gesinn an d'Integratioun zrëckzestellen, fir de Vivre ensemble no vir ze stellen. Dat ass Äert Recht als Politikerin. Mee mir hunn als ADR dat Recht, fir ze soen, och als gewielte Vertrieeder vum Lëtzebuurger Vollek, datt fir eis d'Integratioun un éischter Plaz steet, datt mer déi och an de Schoule wëllen. Well eng vun deene Kriticken, déi mer jo adresséieren un déi Reforme vum Schoulsystem, ass de facto mat deem Wuert, datt an all Schoul differenzéiert gëtt: „D'Kanner sinn ënnerschiddlech, dofir brauche mer och ënnerschiddlech Schoulen.“ Dat eenzegt wierklecht Resultat dovunner ass

eng Segregatioun vun de Kanner no Nationalitéit a Sprooch amplaz vun enger Integratioun!

Mir wëlle jiddereen hei am Land, an och mir heeschen déi Leit wëllkomm, déi kommen, net wéi Dir dat duerstellt, a mir wëlle souguer, datt se komplett integréiert ginn an eis Gesellschaft, och mat eiser Sprooch, mat eiser Kultur, mat eisen Traditiounen. Datt mer dat, wat mir als Traditioun als Lëtzebuurger matbréngen aus der Geschicht vun eisem Land, virginn a mat hinnen deelen. Dat ass eis Konzeptioun vun Integratioun, an zu där sti mer. An déi ass net géint iergendee geriicht, wéi dat hei gesot gëtt, mee et ass, mengen ech, déi generéiert, déi optimaalst an déi éierlechst Approche, déi ee ka géintiwwer Mënschen hunn, déi an dëst Land kommen: Dat ass, fir alles mat hinnen ze deelen, wat mer kënnen offréieren. Alles an engem Geescht vun Zesummeliewen an Integratioun.

Dir hutt och geschwat vun eiser Attitüd géintiwwer de Flüchtlingen. Madamm Cahen, ech invitéieren Iech vu ganzem Häerz, fir dat nozelauschteren, wat mer soen. An all eisen Discoursen, an all eisen Discoursen iwwert déi do Problematik soe mir, datt mir jo soen zum Asyl, a mir gi Schutz fir déi Leit, déi Schutz brauchen, soulaang se e brauchen. Dat ass bei eis Credo.

Wat mir awer och soen, ass, datt Leit, déi kee Schutz méi brauchen, Leit, déi keen Asyl zegutt hunn, müssen d'Land verloossen. Dat ass Respekt virum Rechtsstaat. Mir hu Recoursen. Et si Leit, déi maachen zwee Recoursen, no allen administrativen Decisiounen, déi geholl goufen. A wann d'Gerichter zu där Konklusioun kommen, datt déi Leit keen Usproch dorobber hunn, ma dann ass et rechtsstaatlech, Decisiounen vu Gerichter ze respektéieren an derfir ze suergen, datt déi Leit dann d'Land verloossen. Mee dat ass eng Prozedur, déi mir voll respektéieren.

Mee mir soen awer och, datt Leit, déi vun Ufank u kee Grond fir Asyl hunn, déi aus reng ekonomeschem Grond sollen an Europa kommen, net solle kommen. A mat där Positioun sti mir och net eleng. Well Är Partei am Europäesche Parlament huet en Asyl- a Migratiounspakt elo gestëmmt, wou genau déi do Prinzippien eigentlech d'Grundlag si fir déi Texter, déi Dir mat ugehall hutt als Renew Europe, als Demokratie Partei am Europäesche Parlament.

Madamm Cahen, ech invitéieren Iech, wann Der scho Kriticken un d'ADR adresséiert – wat Äert Recht ass a wat mir och eescht huelen, dofir stinn ech hei an ech äntwerten Iech drop –, dann haalt Iech wann-echgelfit un d'Fakten, well eisem Land ass net gehollef, wa mer an eng politesch Kultur eraufueren, wou mer géintenee polemiséieren amplaz mateneen ze argumentéieren!

Ech soen Iech Merci.

Plusieurs voix | Très bien!

M. Claude Wiseler, Président | Sou, elo musse mer oppassen, wat mer amgaange sinn, hei ze maachen. Ech hunn elo nach zwou Wuertmeldungen. Vu datt déi zwou Parteien nach Zäit hunn, kann ech se net refuséieren. Ech maachen Iech just drop opmierksam, datt heibannen zu engem selwechte Sujet kee méi wéi zweemol därer schwätzen. Domat wär et dann och ofgeschloss. Madamm Cahen, Dir hutt d'Wuert.

Mme Corinne Cahen (DP) | Jo, villmools merci. Ech sinn och elo ganz kuerz, fir dem Här Kartheiser ze soen: Fir awer vollstänneg ze sinn, wéi gesot, soll een net ëmmer nëmmen een Deel zitieren, da muss een och alles zitieren. Well an deem nämmlechen Artikel, wann Der deen e bësse weidergelies hätt an net nëmme just ee Bribe vun engem Saz erausgeholl

hätt, hätt Der gesinn, dass et beim Zesummeliewen effektiv drëms geet, dass mer alleguer zesumme liewen hei am Land. An et ass net, wéi an deem viregte Gesetz steet: „La présente loi s'applique à tous les étrangers séjournant légalement au Grand-Duché de Luxembourg.“ Mee dat Gesetz, dat neit Gesetz betrëfft jiddwereen, well jiddwereen ass fir d'Zesummeliewen hei am Land verantwortlech a jiddweree ka mathëllefen, dass dat Zesummeliewen hei am Land gutt fonctionéiert.

Ech invitéieren Iech – ech liesen en elo net hei vir, Dir hutt e jo –, nach eng Kéier dee ganzen Artikel aus dem „Lëtzebuurger Wort“ vum Februar 2023 ze liesen. Da gesitt Der, dass, wann Der just dee kleng Saz do zitéiert, deen net dat erëmgëtt, wat dee ganzen Artikel seet.

Villmools merci.

M. Claude Wiseler, Président | Merci, Madamm Cahen. Da kritt den Här Goergen nach d'Wuert fir eng Minutt, déi de Piraten iwwregbleift.

M. Marc Goergen (Piraten) | Merci. Ech brauch déi och net, ech kann der Madamm Cahen just Recht ginn. Ech war awer elo e bëssen iwwerrascht, wéi den Här Kartheiser an och den Här Keup virdrun hei eng Kéier iwwert d'Lëtzebuurger Sprooch geschwat hunn. Ech kommen net ëmmer richtig no bei der ADR. Zu Keel-Téiteng hate se nämlech elo explizitt gefrot, dass d'Gemeengekommissiounen géifen op Franséisch gehale ginn. An hei haalt Dir als ADR dann eng Ried fir d'Sprooch. Duerfir kommen ech net ëmmer esou richtig no an Är Sprooch. Duerfir wollt ech awer elo froen, wat dann elo Är Meenung zu eiser Sprooch ass, well ech mengen, Dir dréit Iech hei bëssen, wéi et Iech gefält. Dir hutt nämlech och net wierklech der Madamm Cahen geäntwert op dat, wat se gesot hutt.

Merci.

M. Claude Wiseler, Président | Jo, ech weess elo net, ob mer iwwert de Budget schwätzen. An et war och net geduecht, datt den Här Goergen dem Här Kartheiser soll eng Fro stellen, deen zu dësem Sujet schonn zweemol geschwat huet. An domat wär déi Diskussioun ofgeschloss.

Une voix | Très bien!

M. Claude Wiseler, Président | Ech hunn elo op der Lëscht keen ageschriwwene Riedner méi, an dat ass och gutt esou.

Mir fuere muer de Mëtten um 14.00 Auer mat den Debatten iwwert de Budget weider, wou dann d'Regierung d'Wuert kritt.

6. Motion de M. Marc Spautz relative au soutien de la participation de Taïwan à l'Organisation mondiale de la santé et à l'Assemblée mondiale de la santé au niveau technique en tant qu'observateur

Den Owend steet awer nach, éier Der elo gitt, ee Punkt um Ordre du jour, an zwar wollte mer nach haut iwwert déi Motioun iwwer Taiwan ofstëmmen, déi, wann ech dat richtig gesinn, vun alle Parteien mat ënnerschriwwen ass. Dofir kann dat relativ kuerz gehale ginn.

Wëllt den Auteur nach dozou schwätzen? Här Spautz?

(Négation)

Den Här Auteur huet virdrun alles gesot.

Ass ee Riedner, deen nach wëllt d'Wuert huelen?

Plusieurs voix | Nee!